

**Inuussutissanik immuup sukkuanik akoqanngitsunik pisariaqartitsisunut qanoq akikinnerulersitsisinnaanersugut pillugu misissuinissamik aallartitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuinermit naatsorsorneqassaaq innersuussutit ataasiakkaat aningaasatigut inuiaqatigiinnut kinguneqassanersut.**

(Inatsisartunut ilaasortaq Justus Hansen, Demokraatit)

### **Akissuteqaat**

(Inuussutissarsiornermut, Nukissiuuteqarnermut Ilisimatusarnermullu Naalakkersuisoq)

### **Siullermeerinnineq**

Naalakkersuisut Inatsisartuni ilasortaq Justus Hansen, Demokraatit, qutsavigaat aalajangiiffigisassatut siunnersuutaa inuussutissat immuup sukkuanik akoqanngitsut qanoq aaqqissuussinikkut atuisartunut nioqqtissianik taamaattunik pisariaqartitsisunut akikinnerulersinneqarsinnaaneri pillugit misissuisoqarnissaa pillugu. Ilutigisaanillu aaqqissuussinerusinnaasumi aningaasaqarnikkut suliap kingunerisassai allaasereqquneqarput.

Naalakkersuisunut assut pingaaruteqarpoq qularnaassallugu nunatsinni sumiiffinni tamani nioqqtissanik pilersuinerup aaqqissuulluagaanissaa. Aaqqissuulluagaasumik nioqqtissanik pilersuineq tassaavoq nioqqtissat qanoq ittut neqeroorutigineqartarneri, aamma qanoq akilimmik nioqqtissat pineqartut neqeroorutigineqartarneri.

Naalakkersuisut piffissami matumani suliaqarput misissuinermit annertuumik, nunatsinni nioqqtissat ulluinnarsiutsitta akii pillugit, siunnerfigalugu siunnersuuteqartoqarsinnaanissaa, taamaassappallu qanoq periarfissaqarnerisooq nioqqtissat ulluinnarsiutaasut akiisa appasinnerulersinneqarnissaannut.

Soorunami Naalakkersuisut misissuineq ingerlasooq annertusilluarsinnaavaat, nalilersuinermit periarfissat qanoq innersut nioqqtissat immuup sukkuanik akoqanngitsut atuisartunut akikinnerulersinneqarsinnaaneri pillugit.

Misissuinerit kingunerisaannik Naalakkersuisut inassuteqaatinik suliaqassapput qanoq aaqqissuussinikkut nioqqtissat immuup sukkuanik akoqanngitsut akikinnerulersinneqarsinnaaneri pillugit, naatsorsuusiorlugillu inuiaqatigiinnut aningaasarsiornikkut aaqqissuussinerit pineqartut kingunerisassai.

Taamatut oqaaseqarluta Naalakkersuisut inassutigaat siunnersuutip akuersissutigineqarnissaa.